



**ODLUKA O USLOVIMA I NAČINU DODJELE  
"ŠESTOAPRILSKE NAGRADE GRADA SARAJEVA"  
( prijedlog )**

Predlagač: Gradonačelnik  
Obrađivač: Gradska služba za opću upravu  
i zajedničke poslove

Sarajevo, juni 2019. godine

Na osnovu člana 26. stav 1. tačka 2. i tačka 18. Statuta Grada Sarajeva („Službene novine Kantona Sarajevo“, broj 34/08-Prečišćeni tekst), Gradsko vijeće Grada Sarajeva, na sjednici od \_\_\_\_\_, godine, donijelo je

(prijedlog)

## **ODLUKU O USLOVIMA I NAČINU DODJELE "ŠESTOAPRILSKE NAGRADE GRADA SARAJEVA"**

### **Član 1.**

„Šestoaprilska nagrada Grada Sarajeva“ (u daljem tekstu: Nagrada) dodjeljuje se kao najviše društveno priznanje za značajna ostvarenja i značajne rezultate rada u oblastima:

- privrede,
- nauke i obrazovanja,
- kulture i umjetnosti,
- sporta,
- zdravstva i socijalne zaštite,
- drugim oblastima rada i stvaralaštva,

bez obzira na godinu ostvarenja, a koji doprinose ukupnom unapređenju, promociji i razvoju Grada Sarajeva, kao glavnog grada Bosne i Hercegovine i Federacije Bosne i Hercegovine.

### **Član 2.**

Pod značajnim ostvarenjima, u smislu ove Odluke, podrazumijevaju se djela ostvarena u kontinuitetu koja se ocjenjuju kao doprinos razvoju odgovarajuće oblasti, u skladu s kriterijima uobičajenim za konkretnu oblast, a koja doprinose ukupnom razvoju, odnosno promociji grada Sarajeva.

### **Član 3.**

Kriteriji za dodjelu Nagrade su:

#### **a) za pojedince:**

- izuzetan doprinos u odbrani države Bosne i Hercegovine,
- postizanje značajnih rezultata u oblasti nauke, obrazovanja, zdravstva, socijalne zaštite, kulture, sporta, amaterskog stvaralaštva i drugih društvenih djelatnosti ili najboljih rezultata u teorijskom i praktičnom radu na pojedinom području javnog djelovanja,
- doprinošenje unapređenju radnih procesa kreativnim radom ili inovacijama,
- dobivanje domaćih i međunarodnih priznanja za vlastite inovacije,
- objavljivanje, prikazivanje, izlaganje, izvođenje ili prezentovanje na neki drugi način vlastitih ostvarenja značajnih za širu zajednicu,
- ugled i visoke moralne vrijednosti.

#### **b) za pravna lica:**

- upošljavanje većeg broja radnika,
- ostvarenje značajne dobiti u poslovanju,
- vršenje znatnijih ulaganja u proširenje proizvodnih i drugih kapaciteta,
- postizanje poslovnih uspjeha na nivou međunarodnih standarda,
- najmanje pet godina postojanja i kontinuiranog djelovanja,
- renome uzornog pravnog lica.

### **Član 4.**

Za dodjelu Nagrade, početkom decembra, u sredstvima javnog informiranja objavljuje se javni poziv za predlaganje kandidata za dodjelu Nagrade u tekućoj godini i traje 45 dana.

Nagrada se dodjeljuje:

- Pojedincu
- Grupi (okupljenim pojedincima na realizaciji određenih poslova s rezultatima koji se mogu razmatrati u kandidaturi za dodjelu Nagrade kao značajna ostvarenja, odnosno značajni rezultati rada), i
- Kolektivu (privrednom društvu, ustanovi, udruženju i drugom pravnom subjektu s područja grada Sarajeva, kao i onom van područja grada Sarajeva, ako se njihova ostvarenja, odnosno rezultati rada odnose na grad Sarajevo).

#### **Član 5.**

Nagrada se ne može dodijeliti organima uprave svih nivoa vlasti u BiH, izabranim funkcionerima, poslanicima, vijećnicima svih nivoa vlasti u Bosni i Hercegovini i njihovim srodnicima za vrijeme trajanja njihovih mandata, kao ni zaposlenima u organima uprave svih nivoa vlasti u BiH za ostvarenja koja se odnose na djelovanje u okviru djelokruga posla koji vrše u organu uprave.

#### **Član 6.**

Nagrada se dodjeljuje u obliku povelje, uz novčani iznos koji odlukom utvrđuje Gradsko vijeće na prijedlog Administrativne komisije Gradskog vijeća.

Kad se Nagrada dodjeljuje grupi, svaki član grupe dobija povelju.

Novčani dio Nagrade iz stava 1. ovog člana, raspoređuje se članovima grupe u jednakim iznosima.

#### **Član 7.**

Povelja iz člana 5. stav 1. i 2. Odluke sadrži tekst: "BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, GRAD SARAJEVO", sa suhim grbom Grada Sarajeva, centriran na vrhu stranice formata A3. Ispod teksta iz stava 1. ovog člana, ispisuje se sljedeći tekst: "Na osnovu Odluke Gradskog vijeća Grada Sarajeva o dodjeli "Šestoaprilske nagrade Grada Sarajeva", broj \_\_\_\_, dodjeljuje se:". Na sredini povelje je tekst: "ŠESTOAPRILSKA NAGRADA GRADA SARAJEVA", ime i prezime lica, odnosno imena članova grupe ili naziv kolektiva kojima se Nagrada dodjeljuje. Ispod teksta iz prethodnog stava, ispisuje se kratko obrazloženje, odnosno navodi se oblast rada i stvaralaštva u kojoj je dobitnik Nagrade ostvario značajne rezultate. U donjem lijevom uglu je oznaka datuma, mjesta i broja odluke, a u donjem desnom uglu je potpis gradonačelnika Grada Sarajeva. O izgledu Povelje, odlučuje Gradonačelnik uz prethodno mišljenje Komisije za izbor i imenovanja. Uz Povelju se uručuje i Odluka Gradskog vijeća Grada Sarajeva o dodjeli "Šestoaprilske nagrade Grada Sarajeva" za odgovarajuću godinu, kojom se utvrđuje vrsta i sadržaj Nagrade, dobitnik Nagrade, te uručivanje Nagrade od strane Gradonačelnika na svečanoj sjednici Gradskog vijeća Grada Sarajeva.

#### **Član 8.**

U jednoj godini može se dodijeliti najviše šest Nagrada, iz svake oblasti jedna, bez obzira da li se radi o pojedinačnoj, grupnoj ili kolektivnoj Nagradi.

Nagrada se istom licu, iz člana 4. Odluke, može dodijeliti samo jedanput.

#### **Član 9.**

Nagrada se dodjeljuje svake godine i uručuje 6. aprila, na Svečanoj sjednici Gradskog vijeća. Nagradu uručuje Gradonačelnik i Predsjedavajući Gradskog vijeća.

#### **Član 10.**

Pravo predlaganja kandidata za Nagradu imaju privredna društva, ustanove, udruženja građana, grupe od najmanje 200 građana i druga pravna lica, sa područja Sarajeva.

Subjekti iz stava 1. ovog člana, nemaju pravo isticanja sopstvene kandidature za Nagradu.

Prijedlog iz stava 1. ovog člana podnosi najviši kolektivni organ upravljanja, Skupština ili Upravni odbor odlukom tih organa o podnošenju prijedloga kandidata za Nagradu s tim da je uz prijedlog

dužan dostaviti pismenu saglasnost kandidata da prihvata kandidaturu, te jasno definisati oblast za koju se kandidat predlaže.

Pravo predlaganja kandidata za Nagradu ima i Gradonačelnik.

#### **Član 11.**

Prijedlog iz stava 3. prethodnog člana dostavlja se u tri (3) primjerka sa detaljnim podacima i obrazloženjem.

Obrazloženje sadrži podatke o kandidatu, ukupan radni opus i posebne zasluge u oblasti zbog kojih se kandidat predlaže za Nagradu.

#### **Član 12.**

Gradsko vijeće imenuje Odbor za dodjelu "Šestoaprilske nagrade Grada Sarajeva" (u daljnjem tekstu: Odbor) najkasnije na oktobarskoj sjednici.

Odbor iz stava 1. ovog člana čine članovi Komisije za izbor i imenovanja Gradskog vijeća i šest istaknutih javnih djelatnika iz oblasti:

- privrede,
- nauke i obrazovanja,
- kulture i umjetnosti,
- sporta,
- zdravstva i socijalne zaštite,
- drugim oblastima rada i stvaralaštva, za koje se Nagrada dodjeljuje.

Kolegij Gradskog vijeća Grada Sarajeva kandidira Komisiji za izbor i imenovanja kandidate za članove Odbora iz reda istaknutih javnih djelatnika, iz prethodnog stava. Komisija za izbor i imenovanja utvrđuje prijedlog i upućuje ga Gradskom vijeću Grada Sarajeva na razmatranje i usvajanje.

Predsjednik i zamjenik predsjednika Komisije za izbor i imenovanja Gradskog vijeća su predsjednik i zamjenik predsjednika Odbora.

Mandat članova Odbora iz reda istaknutih javnih djelatnika traje do okončanja postupka izbora laureata za tu godinu.

#### **Član 13.**

Odbor iz prethodnog člana ove odluke, na prvoj sjednici, donosi Poslovnik kojim se uređuje način rada, a posebno se definira tajnost rada Odbora i imena kandidata za dodjelu, do donošenja konačne odluke Gradskog vijeća o dodjeli Nagrade.

Poslovnikom iz stava 1. uređuje se način glasanja Odbora bodovanjem u drugom ili trećem krugu i to tako da kandidat koji ne ostvari minimalan broj bodova Odbora ne može biti predložen Gradskom vijeću na konačno odlučivanje.

#### **Član 14.**

Ukoliko Odbor u toku postupka za dodjelu "Šestoaprilske nagrade Grada Sarajeva" utvrdi da predloženi kandidat ispunjava uvjete za neku drugu oblast, Odbor može predložiti da se o njegovoj kandidaturi glasa u drugoj oblasti.

#### **Član 15.**

U prvom krugu, članovi Odbora glasanjem utvrđuju liste kandidata koji zadovoljavaju uvjete propisane Odlukom i Javnim pozivom u pojedinačnim oblastima.

#### **Član 16.**

U drugom krugu glasanja, Odbor primjenjuje način bodovanja, preciznije utvrđen Poslovnikom o radu, te Gradskom vijeću predlaže najmanje dva prvorangirana kandidata, ako ih je bilo dva ili više, u suprotnom jednog ukoliko je jedan kandidat dobio minimum broj bodova ili ni jednog ako nije dobio ni jedan bod.

Gradsko vijeće donosi konačnu odluku tajnim glasanjem na zatvorenoj sjednici za javnost.

#### **Član 17.**

Ukoliko Odbor ocijeni da određeni prijedlog kandidata ne ispunjava uslove za dodjelu Nagrade, Odbor može uputiti inicijativu prema ovlaštenim predlagачima, gradskim vijećnicima ili gradonačelniku, da podnesu prijedlog za dodjelu drugog priznanja ili nagrade Grada Sarajeva, u skladu sa Odlukom o priznanjima i nagradi Grada Sarajeva.

#### **Član 18.**

Članovi Odbora se obavezuju na tajnost svih podataka o kandidatima, obavezuju se da ne daju izjave u medije ili preko društvenih mreža, sve do zvanično upućenog prijedloga Gradskom vijeću Grada Sarajeva.

Član za kojeg se utvrdi da je prekršio obavezu tajnosti, trajno se isključuje iz rada Odbora.

#### **Član 19.**

Nagrada koja se dodjeljuje pojedincu, odnosno grupi, može se oduzeti.

Pod oduzimanjem nagrade podrazumijeva se oduzimanje povelje pojedincu, odnosno članu grupe. Nagrada se oduzima ako je nagrađeno lice pravosnažnom sudskom presudom osuđeno od Međunarodnog suda za ratne zločine počinjene na teritoriji bivše Jugoslavije, ili koje je pravosnažnom sudskom presudom, od bilo kojeg suda sa područja Bosne i Hercegovine, osuđeno za krivično djelo protiv života i tijela na kaznu zatvora od najmanje godinu dana, protiv slobode i prava građana, protiv dostojanstva osobe i morala, protiv imovine, protiv pravosuđa, protiv službene i druge odgovorne dužnosti, protiv osnova društvenog uređenja i sigurnosti.

Nagrada se može oduzeti ako je nagrađeno lice pravosnažnom sudskom presudom osuđeno na kaznu zatvora preko tri godine ili težu kaznu, a ne radi se o krivičnom djelu iz prethodnog stava.

#### **Član 20.**

O oduzimanju Nagrade odlučuje Gradsko vijeće na prijedlog Odbora.

Odluka o oduzimanju Nagrade objavljuje se u "Službenim novinama Kantona Sarajevo" i sredstvima javnog informisanja.

#### **Član 21.**

Ukoliko priznanje, odnosno nagrada nije uručena dobitniku za života, predaje se članovima njegove uže porodice (bračni drug, djeca i roditelji) i o tome se izdaje potvrda.

#### **Član 22.**

Članovi Odbora imaju pravo na naknadu za svoj rad.

Visina naknade iz stava 1. ovog člana se utvrđuje na isti način kao i za ostala radna tijela Gradskog vijeća, a na prijedlog Administrativne komisije Gradskog vijeća.

#### **Član 23.**

Sredstva za dodjeljivanje Nagrade i za rad Odbora obezbjeđuju se u Budžetu Grada Sarajeva i Odluci o izvršenju budžeta.

#### **Član 24.**

Služba Gradskog vijeća vrši stručne i administrativne poslove i vodi evidenciju o dodijeljenim Nagradama.

**Član 25.**

Gramatička terminologija korištenja muškog i ženskog roda u ovoj Odluci podrazumijeva uključivanje oba roda.

**Član 26.**

Danom stupanja na snagu ove Odluke prestaje da važi Odluka o uslovima i načinu dodjele „Šestoaprijske nagrade Grada Sarajeva“ („Službene novine Kantona Sarajevo“ broj 3/17-Prečišćeni tekst i 49/17).

**Član 27.**

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

Broj:  
Sarajevo,

**PREDSJEDAVAJUĆI  
GRADSKOG VIJEĆA**

Dr. Igor Gavrić

## **OBRAZLOŽENJE**

### **PRAVNI OSNOV**

Pravni osnov za donošenje odluke sadržan je u članu 26. stav 1. tačka 2. i tačka 18. Statuta Grada Sarajeva kojima je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje kao i da donosi odluke o priznanjima i nagradama Grada Sarajeva.

### **RAZLOZI DONOŠENJA**

Odbor za dodjelu „Šestoaprilske nagrade Grada Sarajeva“ je Gradskom vijeću Grada Sarajeva podnio Izvještaj o radu Odbora za dodjelu „Šestoaprilske nagrade Grada Sarajeva“ u 2019. godini sa prijedlogom zaključaka, broj 04-GV-02-239-1/19 od 18.02.2019. godine u kojem je predložio Gradonačelniku da se pripremi novi Nacrt Odluke o uslovima i načinu dodjele „Šestoaprilske nagrade Grada Sarajeva“ a koji će biti razmatran na sjednici Gradskog vijeća Grada Sarajeva u aprilu mjesecu. U navedenom Izvještaju su predložena određena rješenja. Obzirom na naprijed navedeno pripremljen je Nacrt Odluke o uslovima i načinu dodjele „Šestoaprilske nagrade Grada Sarajeva“ koji je bio upućen u javnu raspravu Zaključkom Gradskog vijeća Grada Sarajeva broj: 01-GV.02-547/19 od 24.04.2019. Kao učesnici u javnoj raspravi bili su određeni radna tijela Gradskog vijeća i klubovi gradskih vijećnika. U predviđenom roku trajanja javne rasprave svoje primjedbe je dostavila Komisija za izbor i imenovanja Gradskog vijeća Grada Sarajeva koji su analizirani i o kojima je zauzet stav koji se nalazi u Izvještaju o provođenju javne rasprave na Nacrt Odluke o uslovima i načinu dodjele „Šestoaprilske nagrade Grada Sarajeva“. Obzirom na naprijed izneseno Gradsko vijeće Grada Sarajeva je donijelo ovu Odluku.

### **FINANSIJSKA SREDSTVA**

Sredstva potrebna za realizaciju Odluke obezbjeđuju se u Budžetu Grada Sarajeva.

**I Z V J E Š T A J**  
**O PROVEDENOJ JAVNOJ RASPRAVI NA**  
**NACRT ODLUKE O USLOVIMA I NAČINU DODJELE**  
**"ŠESTOAPRILSKE NAGRADE GRADA SARAJEVA"**

U skladu sa Zaključkom Gradskog vijeća Grada Sarajeva, broj 01-GV-02-547/19 od 24.04.2019. godine, koji je donesen na sjednici Gradskog vijeća Grada Sarajeva 24.04.2019. g., provedena je javna rasprava na Nacrt Odluke o uslovima i načinu dodjele „Šestoaprilske nagrade Grada Sarajeva“.

Od učesnika u javnoj raspravi u predviđenom roku od 30 dana, svoje mišljenje dostavila je Komisija za izbor i imenovanje Gradskog vijeća Grada Sarajeva i to:

1. U članu 10. u stavu 3. iza riječi „najviši kolektivni organ upravljanja“ stavlja se zarez a ostali dio stava ostaje neizmjeren.

Primjedba je prihvaćena i ugrađena u Odluku

2. Komisija za izbor i imenovanja predlaže da se u Odluci definiše da mandat Odbora za dodjelu „Šestoaprilske nagrade Grada Sarajeva“ traje četiri godine, te da Odbor ima status stalnog radnog tijela Gradskog vijeća.

Primjedba se ne može prihvatiti obzirom da je Poslovnikom Gradskog vijeća Grada Sarajeva propisan način formiranja radnih tijela, broj članova i sastav radnih tijela, način rada radnih tijela te koja su stalna radna tijela. Dakle, ukoliko bi se u Odluci definisalo da Odbor ima status stalnog radnog tijela Gradskog vijeća to bi bilo u direktnoj suprotnosti sa Poslovnikom Gradskog vijeća Grada Sarajeva

3. Komisija za izbor i imenovanja predlaže da član 15. i član 16. postanu član 15. te da se definiše sljedeće: da se o predloženim kandidatima za dobitnike nagrade odlučuje bodovanjem u dva kruga, te da se Poslovnikom o radu Odbora definiše postupak bodovanja.

4. Komisija za izbor i imenovanja predlaže da se u stavu 2. člana 15. definiše da Odbor Gradskom vijeću predlaže najmanje dva prvorangirana kandidata ako ih je bilo dva ili više, u suprotnom jednog ukoliko je jedan kandidat dobio minimum broj bodova ili ni jednog kandidata ako nije dobio ni jedan bod.

U skladu sa Jedinistvenim pravilima za izradu pravnih propisa u institucijama BiH koji se primjenjuju i prilikom izrade propisa Grada Sarajeva definisani su članovi 15. i 16. Odluke tj. njihovo spajanje ne bi bilo nomotehnički ispravno. Kroz navedene članove jasno proizilazi da se odabir kandidata vrši bodovanjem u dva kruga ( član 15. i 16. ), a da se precizniji rad Odbora vrši u skladu sa Poslovnikom o radu Odbora. Primjedba 4. je jasno definisana članom 16. Odluke.